



Laclaun da Vrin-Dado cun il vitg da Lumbrein davosvart.

FOTO J. MENOLFI



Crestaulta è in lieu da culegna dal temp da bronz, situà sin la terrassa d'ina collina al vest da Surin.

MAD

Vignogn, Lumbrein e Vrin en la Lumnezia Dadens

■ **La Lumnezia Dadens cumpiglia il territori da las traits anteriuras vischnancas da Vignogn, Lumbrein e Vrin. Dapi il 2013 fa la regiun part da la nova vischnanca da vallada Lumnezia. Tar las características da la Lumnezia Dadens tutgan la culegna preistorica da Crestaulta, las turs d'abitat a Lumbrein, il maletg dal vitg da Vrin (ch'è vegnì modernisà bufatgmain tras l'architect Gion A. Caminada) e la planira da la Greina (che furma il cunfin vers Sumvitg e la Val dal Blegn).**

Vignogn

Anteriura vischnanca politica, circul Lumnezia, district Surselva (fin il 2001 Glogn), construida sin 1241 m lung la via al pe dal Pez Sezner. Dapi il 2013 vischinadi da la vischnanca da vallada Lumnezia. 1325 *Vinnan*, 1469 *Viends*, tudestg Vigens (fin il 1983). 1850 199 abitants; 1900 134; 1950 204; 2000 179. Bain roial durant il temp medieval tempriv e sedia dals ministerials episcopals *de Viggum* durant il temp autmedieval. Il feud è alura passà als conts de Belmont, suenter il 1371 als baruns de Sax-Mesauc (fin il 1473). Il 1538 èn ils da Vignogn sa cumprads libers da l'investgieu da Cuira. Vignogn furnava oriundamain, ensemen cun Surcasti, in vischinadi ed ha appartegnì a la baselgia da vallada da S. Vintschegn a Pleif/Vella fin il 1697. Già il 1345 possedeve la vischnanca dus edificis ecclesiastics, numnadamain la baselgia da S. Flurin e la chaplutta da S. Gudegn (a partir dal 1669 baselgia da sepultura). Suenter il 1970 èn vegnidas construidas en la vischnanca ina chasa da scola cun halla polivalenta e chasas da vacanzas ed ins ha exequì 1968–99 la meglieraziun dal funs. La scola primara sa chatta a Vella ed a Cuschnaus, la scola secundaria e reala a Vella. Part da la populaziun da lingua rumantscha: 2000 88,8% / 93,8% (meglra lingua / tuttas indicaziuns). *Adolf Collenberg*

Lumbrein

Anteriura vischnanca politica, circul Lumnezia, district Surselva (fin il 2000 Glogn). Dapi il 2013 vischinadi da la vischnanca da vallada Lumnezia. Lumbrein sa chatta en la part dadens da la Lumnezia e cumpiglia il vitg principal (1405 m), las fraziuns da S. Andriu e Nussaus a la via principala per Vrin e, da l'autra vart dal Glogn, Surin, Prustg e Silgin (ca. 1245 m). Las culegnas da Molina e Curtinatsch èn vegnidas bandunadas enturn il 1750, Farglix enturn il 1900. Ca. 850 in villa *Lamarine* (tenor ina copia dal 16avel tschientaner), 1231 *de Lumarins*. 1850 529 abitants; 1900 531; 1930 475; 1950 584; 2000 399.

Crestaulta sper Surin

Crestaulta è in impurtant lieu da culegna dal temp da bronz, situà sin la terrassa d'ina collina a ca. 300 m al vest da Surin. Walo Burkart l'ha scuvert il 1935 ed ha interpretà exchavaziuns parzialas il 1935–38. Attestadas èn traits fasas da colonisaziun: en

la stresa inferiura dal temp da bronz tempriv (ca. 2000–1700/1600 a.C.) han ins mess a la glisch numerusas foras per pals da simplas construcziuns en lain cun fulars (chamonas da ca. 6,5 sin 4 m). Da la segunda stresa, probablmain già dal temp da bronz mesaun (1700/1600–1500/1400 a.C.), derivan diversas construcziuns cun mirs sitgs per part massivs (che na permettian dentant betg da reconstruir plans d'edifizis), pliras fuainas, in pitschen «tschaler» radund, restanzas d'in furn da vaschler e fastizs d'incendis. En la stresa superiura, databla en il temp da 1500/1400–1300 a.C., han ins chattà tranter auter fastizs da fuainas, da suladas e d'in palantschieu da lain. Las exchavaziuns han plinavant purtà a la glisch chats da cheramica attribuids a l'uschenumnada Cultura interalpina dal temp da bronz (numnada pli baud Cultura da Crestaulta), en pli iseglias da bronz (farclas, maneras, stiles, gluvas), artefacts da crap e d'ossa, graunins carbonisads sco era rests dad oss d'animals e restanzas da metal. Per quai che regarda l'appartegnentscha culturala e la posiziun topografica da Crestaulta existan parallelas cun las culegnas dal temp da bronz sin il Padnal (vischnanca da Sagnin). En la cultra da Cresta Petschna, a 150 m da Crestaulta, han ins scuvert il 1947 in pitschen santeri cun almain 11 fossas a cremaziun dal temp da bronz tempriv e mesaun, exchavadas medemamain da Walo Burkart il 1947–48. L'inventari dals chats (gluvas, penderliezs, bratschlets) lascha supponer ch'i sa tractia là da fossas da dunnas che stattan probablmain en connex cun la culegna da Crestaulta.

Jürg Rageth

Vischnanca

En il temp medieval tempriv fascheva Lumbrein part dal patrimoni imperial francon. Ils Gualsers e Blegnascas, arrivads en il temp medieval tardiv, èn sa domiciliads surtut a la riva dretga dal Glogn ed èn vegnids romanisads. Tranter lur bains (*curtes*) e Lumbrein hai dà savens dispita per ils dretgs da giudida. Sco feud episcopal ha Lumbrein fatg part enturn il 1350 da la chastellania dals signurs de Belmont, suenter il 1371 da quella dals de Lumbrein/Lumerins, a partir dal 1390 da quella dals de Sax-Mesauc. Dapi il 1395 è Lumbrein attestà sco part dal cumin da la Lumnezia. Ils dretgs episcopals èn vegnids cumprads ora il 1538. La baselgia da S. Martin, ch'apartegniva a la baselgia da Pleif/Vella (S. Vintschegn), è daventada ina plaiv autonoma tranter il 1345 ed il 1452. L'actuala baselgia parochiala è vegnida construida il 1646. Lumbrein è ina vischnanca tradiziunalmain purila, ma il dumber dals manschis purils è sa diminuì fermamain dapi ils onns 1950. Ina meglieraziun generala è succedida suenter il 1975. A partir dal 1970 han ins pudì registrar in modest svilup dal turissem. Il 2005 lavuravan 46 % da las persunas cun activitad da gudogn en l'emprim sectur, 33% en il terz. Part da la

populaziun da lingua rumantscha: 2000 89,5% / 93,8% (meglra lingua / tuttas indicaziuns). La vischnanca figurescha en l'Inventari dals maletgs da vitgs svizzers degns da protecciun. *Adolf Collenberg*

De Lumbrein [Lumerins, Lumbrins]

Impurtanta schlatta da ministerials grischuns durant il temp medieval e famiglia da magistrats en il temp da furmaziun e svilup da las Traits Lias e da la Republica. La tur Casti, situada al cunfin meridional dal vitg da Lumbrein, ha servì a la famiglia a l'entschatta da residenza. Il 1231 cumpara *Henricus de Lumarins* sco perditga da la claustra da S. Gliezi/Cuira. En il 13avel tschientaner eran ils de Lumbrein parentads cun la famiglia Torre da la Val dal Blegn. Konrad è stà avat da Mustér dal 1239–47. Sco perditgas en la Val dal Rain Anteriu ed en la Val dal Blegn èn attestads il 1281 *Albertus* ed il 1298 *Burchardus e Redulfus de Lumbrein*. Tranter il 1371 ed il 1511 èn ils de Lumbrein stads chastellans episcopal en Lumnezia. In *advocatus de Lumerins* figurescha il 1377 sco chastellan sur tut ils subdits episcopals da la Val dal Rain Anteriu (*Muntinen*) al lieu da dretgira da Sagogn. En ils onns 1410 disponivan ils de Lumbrein da dretgs sur ils chastels da Rappertg e da Baldestein en la Tumleasta. Lur influenza politica ha cuntanschi sia culminaziun il 1429, cura ch'els han cumprà dals Werdbergs il chastè ed il signuradi da Löwenberg ch'els han possess fin tranter il 1481 ed il 1489. Quest acquist ha rinforzà lur posiziun entaifer la Lia Grischa, en la quala els han mess plirs landrehters, l'emprim da quels *Hans de Lumbrein* che cumpara già a chaschun dal sarament da la Lia Grischa il 1424 a Trun. Il chapitani Benedetg, landrehter dal 1451–52, ha sigillà ils 2 da matg 1451 l'alleanza d'amicizia cun l'Engiadina ed il 1471, en segunda posiziun suenter l'avat da Mustér, quella cun la Lia da las Diesch Dretgiras. Ses figl Hans Lombris è stà landrehter dal 1484–85, nov onns chastellan sco era bandierel da la Lumnezia dal 1491–99. El ha sigillà il 1497 il patg cun ils Set Lieus confederads ed è stà in dals chapitanis a la Chavalaina (1499), nua ch'el ha cumandà, ensemen cun Wilhelm Rink, la colonna ch'ha tschinclà a moda decisiva l'adversari. Ils de Lumbrein han consolidà lur posiziun cun s'alliar tras maridaglia cun las familias Capaul, Mont, Valendau, Fontana e Planta. Suenter il 1500 han els succumbì en lur rivalitad permanenta definitivamain als de Mont da Vella, als quals els avevan cedi già pli baud il signuradi da Löwenberg. La tur a Lumbrein è ida als Capauls. Suenter il 1511 n'han ils de Lumbrein betg pli occupà uffizis d'impurtanza. Perquai ch'els n'avevan betg prenti part al servetsch ester, n'han els betg pudì cumpeter materialmain (grazia a pensius) cun las autras familias. Da la lingia dals de Lumbrein da la Lumnezia, ch'era sa domiciliada via Glion enturn il 1450 a Trun e Zignau, èn descendids Hug, Conrad e Gaudenz, tuts

trais landrehters da la Lia Grischa. Las actualas familias Lombris e Lombriser derivan probablmain dal rom da Trun.

Martin Bundi

Vrin

Anteriura vischnanca politica, circul Lumnezia, district Surselva (fin il 2001 Glogn), situada en la part interna da la Lumnezia al pe dal Pass dal Diesrut (funtaunas dal Glogn) e da la Greina. Dapi il 2013 vischinadi da la vischnanca da vallada Lumnezia. Il territori cumpiglia las culegnas Vrin Dado (1451 m), Vrin Dadens (center da la vischnanca), Cons, Ligiazium e Sogn Giusep. A sias anteriuras culegnas appartegnan Pignola (1685 m), Puzatsch, Foppa, Campun, Vilegn, Schareida, Blengias e Vanescha. 1208 *Varin*. 1850 466 abitants; 1900 366; 1950 441; 2000 249. Scuvarta da mutagls da 5000 onns dal gaud paleolitic sin l'Alp Blengias (1980 m). Vrin è vegnì urbanisà da Rumantschs da Lumbrein en il temp medieval aut e tardiv. En il 13avel tschientaner ha la vischnanca appartegnì parzialmain a la claustra da S. Gliezi/Cuira ed era abitada da purs per part servs respectivamain libers ch'han furnà a Vrin Dadens in emprim coc d'in vitg. Sco feud da l'investgieu è la vischnanca da Vrin stada suttamessa als conts de Belmont, suenter il 1371 als de Montalt ed a partir dal 1390 als de Sax-Mesauc ed è sa cumprada libra il 1538. A partir dal 15avel tschientaner han ils da Blegn explotà las alps Blengias (1447), Scharboden (1478) e Greina (1494). En l'abitadi da Vanescha (menziunà il 1375) èn sa reunidas traits gruppas linguisticas: Gualsers (assimilads spert), Tessinai (fermamain represchentads, evtl. ils fundaturs) e Rumantschs. Fin a l'access da Vrin a la via chantunala a Glion il 1887, ha la vischnanca tgrà relaziuns intensivass cun il Tessin superiu. La baselgia da la S. Naschientscha da Maria e da S. Gion Battista (menziunada il 1345) ha appartegnì fin il 1597, sco chaplania, a la baselgia da vallada da S. Vintschegn a Pleif/Vella. Vrin è ina vischnanca da purs cun immensas pastgiras alpestras, ma pertutgada da l'emigraziun. Meglieraziun dal terren decidida il 1982. Suenter cuntraversas ha il consorzi da las Ovras electricas Greina renunzià il 1986 a l'exploziun da la planira da la Greina. Il 1998 ha Vrin survegnì il Premi Wakker. Part da la populaziun da lingua rumantscha: 2000 95,6% / 98,8% (meglra lingua / tuttas indicaziuns). Dapi il 1979 exista la Fundaziun Pro Vrin.

Adolf Collenberg

Vanescha

Anteriura culegna (1789 m) da la vischnanca da Vrin, menziunada per l'emprima giada il 1375. Cruschada da la colonisaziun da la retroterra da Vrin. Qua sa tagliavan las vias ed ils interess dals Rumantschs lumnezians, dals Gualsers da la Val S. Pieder e dals Tessinai da la Val dal Blegn (oravant tut Semione ed Aquila). Ils fundaturs da la culegna n'èn betg enconu-

schents. Tenor ils toponims predominavan durant il temp medieval tardiv ils purs immigrads da la Val dal Blegn ch'èn dentant (gist sco ils Gualsers) vegnids rumantschs. Per il temp medieval tardiv èn documentads plirs aclauns ed in mulin, tranter auter il bain *Molyna*, il 1494 en possess da Pleif/Vella. Il 1801 vivevan set familias durant l'entir onn (exceptà ils mais favrer fin avrigl) a Vanescha, suenter il 1890 è la culegna vegnida bandunada (dapi alura aclas). Las stretgas relaziuns cun il Tessin èn vegnidas interruttas suenter l'access da Vrin a la via chantunala a Glion (1887). La fiera da Ligiau ha alura pers si' impurtanza ed ils purs da la Val dal Blegn han surlaschà lur alps als Grischuns. *Adolf Collenberg*

Greina

Vallada alpina nunabitada, situada ad in'autozza da 2190 fin 2360 m tranter Sumvitg e Vrin e la Val dal Blegn al sparta-auas cun il chantun Tessin. La Greina vegn identitgada cun il *Mons Aduelas* descrit dal geograf grec Strabon. Il passadi tranter la Val dal Rain e l'Italia ha giugà fin enturn il 1900 ina rolla impurtanta per il commerzi da muvel ed il commerzi en detagl pratitg dals Lumnezians a las fieras tessinaias, sco era per ils avdants da la Val dal Blegn ch'han utilisà quest passadi a partir dal 15avel tschientaner per cuntanscher lur alps davos Vrin (Blengias e.a.). Il Pass Crap (italian Passo della Greina) è dentant adina restà en la sumbriva dal Lucmagn. En possess da la dretgira da la Lumnezia, è la Greina vegnida vendida il 1494 sco feud ereditar ad Aquila, cun resalva dal dretg da chargiar la Greina cun chavals lumnezians, utilisà la davosa giada il 1902 e vendì medemamain ad Aquila il 1929. Il 1781 han Aquila e Semione gi litas pervia dals cunfins da las alps tranter la Greina e la Val Camadra. A partir dal 1885 han il Grischun ed il Tessin reglà ils cunfins chantunals. Ils projects da vias e viafiers dal 19avel e 20avel tschientaner, propagads sco alternativa a l'amplificaziun dal Gottard, n'èn mai vegnids realisads. Il project d'in lai da serra, lantschà da las Ovras electricas da la Svizra Nordorientala (OENO/NOK), è vegnì bandunà il 1986 suenter ina campagna nazionala per la protecciun da questa cuntrada da grond'impurtanza naturala e culturala. La Greina è ina cuntrada tractada savens en l'art (p.ex. Bryan Cyril Thurston) ed en la litteratura rumantscha (Toni Halter, Gion Deplazes, Leo Tuor). *Adolf Collenberg*

Lexicon Istoric Retic

Il LIR cumpiglia bundant 3100 artigels (geografics, tematics, artigels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.